

SAVEZ UDRUŽENJA GRAĐANA  
GEODETSKE STRUKE BOSNE I HERCEGOVINE

**PROŠIRENA SJEDNICA PREDSJEDNIŠTVA**

Na osnovu člana 40. Statuta Saveza Udruženja građana geodetske struke Bosne i Hercegovine, održana je *proširena* sjednica Predsjedništva, Sekretarijata, Redakcijskog odbora i Izdavačkog savjeta.

Sjednica je održana u četvrtak 30.09.2004. godine u 12 sati u prostorijama Uprave za geodetske i imovinsko pravne poslove BiH, Sarajevo, ul. Reisa Džemaludina Čauševića br. 6, soba broj 19. Sjednicom je predsjedavao predsjednik Saveza Mustafa Begić.

*Prisutni:* Mustafa Begić, Tomislav Krzyk, Mirsad Bakšić, prof.dr. Nihad Kapetanović, Antonija Sikimić, Sabira Sarvan, Alija Dolovac, Zijad Džananović, Eldin Đonlagić, Fahrudin Đuzo, Rado Fazlić, Šukrija Gavranović, Fadil Hodžić, Admir Mulahusić, Esad Mahir, Džanina Omićević, Nedim Rakić, Šučrija Sarić, Salih Išerić i Esad Vrce.

*Dnevni red:*

1. Izvještaj o radu predsjedništva za period 2002 – 2003. godine.
2. Izvještaj nadzornog odbora, odnosno Komisije.
3. Usvajanje završnog računa za 2002 – 2003. godinu.
4. Donošenje odluke o blagajničkom maksimumu.
5. Kadrovske promjene u organima i tijelima Saveza.
6. Razno.

Prije realizacije dnevnog reda odana je počast umrlim članovima Predsjedništva; prof.dr. Faruku Seleskoviću, Rajmundu Jakubiku i Huseinu Islamoviću.

**IZVJEŠTAJ O RADU PREDSJEDNIŠTVA ZA PERIOD 2002. – 2003. GODINE**

Rad Saveza udruženja građana geodetske struke Bosne i Hercegovine nastavljen u skladu s članom 1. Ustava Bosne i Hercegovine, naime s namjerom da se iskoriste Ustavne mogućnosti kontinuiteta rada i time pravo na članstvo u međunarodnim asocijacijama i udruženjima («član 1. Republike Bosne i Hercegovine, čije je zvanično ime Bosna i Hercegovina, nastavlja svoje pravno postojanje po međunarodnom pravu kao država, sa unutrašnjom strukturom modificiranom ovim Ustavom i sa postojećim međunarodno priznatim granicama. Ona ostaje država članica Ujedinjenih naroda i može kao Bosna i Hercegovina zadržati članstvo ili zatražiti prijem u organizacijama unutar Ujedinjenih naroda, kao i u drugim međunarodnim organizacijama»). Ista odredba se odnosi na sve zemlje nastale iz bivše SFRJ. Odredbu sa njenim mogućnostima iskoristile su druge zemlje za nastavak članstva u geodetskim međunarodnim asocijacijama osim Bosne i Hercegovine. Stoga je u proteklom periodu održano niz sastanaka i dogovora na nivou sadašnjih udruženja u Bosni i Hercegovini (Tomislavgrad sa učesnicima Fuad Bilajac – Udruženje Tuzla, Zdravko Prka, Željko Obradović, Ivan Lesko – Udruga Herceg Bosne, Zoran Gavrić, Todor Panić – Udruženje Republike Srpske, Fadil H. Muhamedović, prof.dr. Faruk

Selesković, Mustafa Begić – Savez Bosne i Hercegovine. Zaključak je da se nastavi sa razgovorima. Stoga je uslijedio sastanak rada u Gradačcu sa istim sastavom. Spremnost je bila da se, obzirom na potrebe, nastavi i ubrzaju razgovori, s ciljem stvaranja Saveza Bosne i Hercegovine, priznatog i verifikovanog od svih udruženja koja djeluju na teritoriji Bosne i Hercegovine. U nastavku rada po ovom pitanju ispušteni su predstavnici Saveza Bosne i Hercegovine, a rad je nastavila radna grupa formirana od regionalnih udruženja. Do danas nisu usaglašeni stavovi.

Bez obzira na ovakvo stanje Savez Bosne i Hercegovine nastavio je rad na međunarodnom planu. Predstavnici Saveza Bosne i Hercegovine bili su uključeni u asocijaciju Komisije za ekonomske odnose pri UN-Komisija za zemljišne informacione sisteme, Komisiju za satelitska mjerenja, Komisiju za toponime, a kao član sa statusom posmatrača, na prijedlog Saveza Bosne i Hercegovine po prijedlogu Akademije za nauku i umjetnost Bosne i Hercegovine, Bosna i Hercegovina primljena je u IUGG (International Union of Geodesy and Geophysics), (predstavnik BiH je bio prof.dr. Faruk Selesković, a sada je doc.dr. Zdravko Galić).

O ostalim aktivnostima istakao bih organizaciju obilježavanja godišnjica geodetske službe Bosne i Hercegovine, izdavanje Geodetskog glasnika, distribucija glasila i drugih aktivnosti.

U godinama koje dolaze, prodorom nauke, a s njom i novih tehnologija, međunarodnih integracija, posebno u Evropi, trebalo bi ubrzati rad na okončanju rada na definisanju Saveza Bosne i Hercegovine, učlanjenju u međunarodne asocijacije i udruženja, organizaciji kongresa geodeta Bosne i Hercegovine, jače uključivanje Saveza u predstojeće transformacije geodetskog sistema, te pripremu i donošenje propisa iz geodetske oblasti.

Hvala

Predsjednik Predsjedništva  
*Mustafa Begić, s.r.*

Nakon izvještaja o radu Predsjedništva za period od 2002 do septembra 2004. godine, glavni i odgovorni urednik Geodetskog glasnika prof.dr. Nihad Kapetanović, podnio je izvještaj o izdavanju časopisa Geodetskog glasnika, za period od 1987 do 2003.godine, nakon čega je uslijedio Izvještaj nadzornog odbora, odnosno Komisije, te usvajanje završnog računa za period 2002 i 2003.godine, kao i donošenja Odluke o blagajničkom maksimumu.

Svi izvještaji su jednoglasno prihvaćeni.

U nastavku sjednice dugo se razmatralo o kadrovskim promjenama u organima i tijelima Saveza, a nakon prijedloga i diskusije zaključilo se:

- Za predsjednika Predsjedništva Saveza. predloženi kandidat se nije prihvatio, tako da je ovo imenovanje ostalo otvoreno.
- U Predsjedništvo se imenuju Admir Mulahusić, Esad Mahir i Salih Išerić.
- Za glavnu i odgovornu urednicu Geodetskog glasnika imenovana je mr. Medžida Mulić. Ovo imenovanje je uslijedilo nakon što je obavljen razgovor sa predloženom.
- Za zamjenicu glavne i odgovorne urednice imenovana je Slobodanka Ključanin. Ovo imenovanje je uslijedilo nakon što je obavljen razgovor sa predloženom.
- Za Predsjednika Redakcijskog odbora imenovan je dr. Zdravko Galić.

- U Izdavački savjet imenovana je Džanina Omićević.

U nastavku rada sjednice dati su i sljedeći prijedlozi, zaključci i zaduženja:

- Prof.dr. Nihad Kapetanović, Antonija Sikimić i Rado Fazlić, predlažu da se organi Geodetskog glasnika i Predsjedništvo Saveza prošire sa predstavnicima privatnog sektora, radnih organizacija i općina van Sarajeva.
- Prihvaćen je prijedlog Mustafe Begić da uže Predsjedništvo razmotri u cijelosti ovaj prijedlog i da ga iznese na narednoj sjednici Predsjedništva.
- Rado Fazlić informisao je prisutne o razgovorima predstavnika geodeta Podružnice Tuzla, Republike Srpske i Herceg Bosna, o potrebi postojanja Saveza na nivou Bosne i Hercegovine. Mišljenja su da se na cijeloj teritoriji BiH oforme podružnice koje bi onda osnovale Savez BiH.
- Eldin Donlagić smatra da je potrebno u Predsjedništvo Saveza kooptirati i predstavnike udruženja geodeta Republike Srpske i Herceg Bosne. Prihvaćen je prijedlog da se na narednu sjednicu Saveza pozovu iz Republike Srpske Obrad Dragičević i Herceg Bosne Darko Raspudić.
- Mustafa Begić smatra da je za rješavanje ukupne problematike geodetske struke u Bosni i Hercegovini potrebno organizovati i kongres geodeta Bosne i Hercegovine.
- Predloženo je da se organizuje susret ili skupština geodeta BiH, sa pratećim savjetovanjem.
- Zadužuje se uže Predsjedništvo da imenuje Inicijativni odbor za realizaciju ovih prijedloga.

*Iz Saveza*